


*Historia 2*

# Warhafftige vnd er-

schreckliche Zeitung von dem grausamen Feind dem Moscoviter.



*che*

ANNO M. D. LXIII.



*H. Prof. 164*

**D**er Muscoviter ist vor wenig Wochen  
dem König von Polen ins Land gefallen/  
vnd hat eine Fesung Polozki oder Ples-  
ki genant / so in Littawen 16. meilen von  
der Wilde gelegen / mit grosser gewalt im sechsten  
Sturm eröbert / die Stad ganz vnd gar gleich  
der Erden weg gebrandt / vber zwenzig tausent  
Menschen jemerlich zu hacken vnd erwürgen las-  
sen / Vnd ist die Tyranney nicht auszusprechen/  
so er an Fräwen vnd Jungfräwen / vnd jungen  
Kindern hat vben lassen. Er hat in die sechzig tau-  
sent Menschen / aus denen daselbst angelegenen ör-  
ten in die Mosche getrieben / die Fräwen vnd Jung-  
fräwen alle entblöset / vnd also nackt gebunden/  
gefangen wegtreiben lassen / Darunter der Boy-  
woda oder Heubtman sampt seinem Weibe / de-  
nen er das leben geschanckt / auch gewesen.

Vnd ist in denselben Landen solch ein schrecken/  
das der fürnemeste Fürste in Littawen / Herr Ni-  
colaus Kadzauil genant / aus seinem Fürstent-  
thumb geflogen / vnd dasselbige gar verlassen hat.

Nach solchem Sieg ist der Barbarische / greu-  
liche Feind mutiger worden / vnd eilet stracks auff  
eine andere Stad in Polen / Rioff genant / welche  
am Wasser / Borischenes genant / gelegen ist / da-  
mit



mit er den Polen des orts / die Prouiant entzihet /  
vnd die armen Leute also weiter bezwinge / vnd in  
seine gewalt bringe.

Er hat auch also bald vierzig tausent Tatern  
(denn er derselbigen sechzig tausent bey sich hat)  
auff die Wilde geschickt / welche auff zwelff meilen  
weges lang / zur Stad zu / alles mit Feuer vnd  
Mord verheren vnd verwüsten. Der meinung/  
sich hernacher gleicher gestalt an dieselbige Fesun-  
ge zu machen. Vnter andern schrecklichen Zei-  
tungen zu entbieten / hat er dem König von Polen  
anzeigen lassen / Das er einen Todten Sarcck bey  
sich füre / vnd wölle nicht ehe friede halten / es were  
denn des Königs von Polen / oder sein eigen  
Kopff / in denselbigen Sarcck / so von Silber ge-  
macht sein sol / gelegt.

Seine macht / darmit er jho anzeuhet / ist ober  
zweimal hundert tausent vnd sechzig tausent  
Man.

Von diesem schrecklichen Feind meldet der hei-  
lige Prophet David / in seinen Psalmen / Vnd  
lesst sich ansehen / als würde er der sichern Welt  
Kute sein / von der er etlich Jar her / vntrach-  
tet / seiner grausamen gewalt vnd wüteren / ist ver-  
achtet worden. Der allmechtige Gott wolle im

gnediglich wehren. Vnd den grossen Potentaten/  
Königen / Chur vnd Fürsten / im heiligen Römi-  
schen Reich / die augen öffnen / das sie zu ihres Va-  
terlands rettunge vnd abwendung / solchs schreck-  
lichen Feindes mehr vnd vleissiger / denn  
(Gott sey es geklaget) bis hero  
geschehen / betrachten.

